



Kamis, 13 Juli 2023

Ogen: Amos 1:3-5



Ngerik Kalak Si Deban



Bas lingkungan kalak si perjuma page nta h pe sabah, semal istilah ngerik. Ngerik e ilakoken i bas peranin. Kenca ipepulung kerina ruhi page, isusun me i bas sada sada ingan. Kenca bage emaka ierik, ierik e ertina iperjaki, gelah sirang page ras tangkena. Bas merjaki ruhi page ndai, megati nge iputarken ras la itanggunggi ndehkenca, tujunna gelah ula lit si tading sitik pe page ndai guna iperani. Termajun zaman, kenca lit motor ras traktor, pengeriken ndai ilakoken alu roda motor ras traktor si mentas-mentas i babo ruhi page. Adi gundari enggo imasukken saja kubar mesin penggiling page, sirang me page ras ruhina.

Kitab Amos make kata pengeriken jadi bahasa sinuduhken uga kejamna bangsa Siria man kalak Gilead, bagin bangsa Israel kesusuren Gad, Ruben ras Manasye. Penindasen si ilakokenna seh kal beratna, desken ierik alu gereta besi. Kejahatenna nggo ngelebihi batas kesabaren Tuhan. Sabap memang suruh Tuhan bangsa enda ngukum kalak Gilead, tapi labo gelah bene, bagi si ibahan bangsa Siria enda. Erkiteken si e Tuhan nuntut pembalasan ras tanggungjawab man bangsa Siria enda.

Arah kata enda kita erlajar, manusia si sejati eme manusia si mperlakukan manusia si deban alu bermartabat, bagi manusia seutuhna. Ula si ban teman manusia e desken benda mate, barang si la meherga. Sebab kerina kita itepa alu serupa ras gambar Dibata. Memang kimawen lit jelma manusia e ncedai ukurta lebihen asangkan sidebanna, turah me emosita, merawa kita. I bas merawa e ingetlah maka labo ipediat Tuhan janah labo ibenarkenna kita alu sengaja nakiti bahkan meneken kesah teman manusia. Bagepe alu la lit alasen si jelas mpekitik kecibal kalak, nta h erkiteken ia cacat, musil, la merupa, la seri adat nta h budayata. Inget labo kita hakim man teman manusia e. Tuhan kap hakim man kerinana, IA erdolat nandangi kerina tinepana, ipindoNa pertanggungjawabpenta adi lalap kita erdosa janah la nggit jera.

☞ *Manusia kerina itepa arah abu taneh, labo lit ganjangan abu e ras abu sideban.*